


REDUCCION DEN TARIFA DI CORIENTE



WWW.SOLODIPUEBLO.COM



SOLODIPUEBLO@GMAIL.COM

E ULTIMO DOS AÑANAN ARUBA NO A PRESTA UN DEBCHI!

Oponente politico ta duna
informacion incorrecto tocante debe
nacional



MINISTER GEOFFREY WEVER TA RESALTA E RELACION COMERCIAL IMPORTANTE ENTRE ARUBA Y COLOMBIA



HIBANDO UN CAMPAÑA FUERTE, BISHITANDO CAS PA CAS Y A RICIBI UN BON RECEPCION



Orario di servicio Diabierna 8 november 2024

En connexcion cu un reunion obligatorio pa su empleadonan, Banco Central di Aruba (BCA) ta informa cu e lo ta sera pa publico dia **8 november 2024** entre **8:30 di mainta pa 12:30 di merdia**. BCA lo ta habri bek pa publico na e horario usual parti atardi entre **1:00 di merdia pa 5:00 di atardi**.


Aruba, 6 november 2024

Banco Central di Aruba

Prome Minister Evelyn Wever-Croes:

E ULTIMO DOS AÑANAN ARUBA NO A PRESTA UN DEBCHI!

Oponente politico ta duna informacion incorrecto tocante debe nacional



Dialuna 4 di november durante e Conferencia di Prensa di Gobierno di Aruba, Prome Minister Evelyn Wever-Croes, a elabora riba e mentiranan cu Parlamentario Mike Eman ta plamando den pueblo di riba tema di e debe nacional.

Prome Minister ta indica cu ta importante pa refuta informacion incorrecto cu ta wordo infundi den pueblo di Aruba, e asina

yama; E-manipulacion di Mike Eman. Actualmente por tuma nota cu Parlamentario Mike Eman como lider di oposicion ta usa un grafico bieu pa bruha tera cu e debenan di Aruba a subi.

Prome Minister ta accentua den e palabranan mas crioyo posibel, cu Aruba tin dos aña sin presta un debchi. Y Aruba tin dos aña ta pagando debe y logicamente esey

kiermeen cu e debe ta baha. Parlamentario Mike Eman ta usando un grafico durante su campaña unda por wak cu el a para su conteo te na e prome kwartaal di aña 2023 unda por mira un aumento chikito di e debe. Pero e no a compar'e cu e prome kwartaal di 2024, y usando e grafico na e manera ey e ta duna un impresion falso. Pero ora muestra graficonan actual bo ta mira cu e debe ta

bahando y pa 2024 e ta baha aun mas.

Ta di compronde cu e debe a subi na 2020-2021-2022, pasobra e pandemia di Covid19 a pone cu mester a presta placa pa yuda esnan cu a perde trabou, y yuda comerciantenan pa no bati bancarota. Y den e prome kwartaal di 2023 a ricibi e ultimo fianza pa paga e ultimo fase y subsidio di salario.

“Pues Lider di oposicion Eman ta usando grafico

cu datonan bieu pa spanta y manipula e pueblo y ta di lamenta paso e Lider di oposicion tin e informacion nobo y corecto unda ta indica cu e debe ta bahando. Mi ta ripiti, Aruba tin dos aña sin presta un debchi y cu e echo ey y pagando debe, ta significa cu e debe nacional ta baha, y esaki ta yama: un maneho financiero responsabel”, Prome Minister a indica.

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



REDUCCION DEN TARIFA DI CORIENTE

Oranjestad, 5 di november 2024 – Gerencia di ELMAR ta participa na nos comunidad cu entrante awe, diamars 5 di november 2024, a haya aprobacion pa reduci e tarifa cu 4.2%. E reduccion aki ta aplicabel riba e componente variabel di e tarifa di coriente. E reduccion aki a bira posibel debi cu e tarifa di compra di energia cu ELMAR ta paga na WEB a baha. E suma fiho di e prijs di coriente lo keda igual.

Na maart 2023, ELMAR a anuncia un rebaho di prijs di coriente cu 7.1%, y awor despues di ricibi un miho tarifa di compra di energia for di WEB, esaki a crea e espacio cu ta permiti ELMAR pa baha e prijs di coriente pa consumidornan. ELMAR

ELMAR		PRIJS DI CORIENTE 2023	PRIJS NOBO DI CORIENTE 2024
		PRIJS DI CORIENTE DESDE 1 DI MEI 2023	PRIJS DI CORIENTE DESDE NOVEMBER 2024
A		Huishoudelijk tarief (A-Tarief)	Huishoudelijk tarief (A-Tarief)
A1	0 - 500	AWG. 0.3580/kWh	AWG. 0.3431/kWh
A2	501 - 1000	AWG. 0.3684/kWh	AWG. 0.3531/kWh
A3	> 1000	AWG. 0.4847/kWh	AWG. 0.4645/kWh
	Vastrecht	AWG. 12.50	AWG. 12.50
B		Zakelijk tarief (B/BB-Tarief)	Zakelijk tarief (B/BB-Tarief)
	Variabel tarief	AWG. 0.5680/kWh	AWG. 0.5444/kWh
	Vastrecht	AWG. 100.00	AWG. 100.00
C		Scholen, kerken, etc (C-Tarief)	Scholen, kerken, etc (C-Tarief)
	Variabel tarief	AWG. 0.5123/kWh	AWG. 0.4910/kWh
	Vastrecht	AWG. 100.00	AWG. 100.00
DB		Grootverbruik (DB-Tarief)	Grootverbruik (DB-Tarief)
	Variabel tarief	AWG. 0.5463/kWh	AWG. 0.5236/kWh
	Vastrecht	AWG. 10.50/geïnstalleerde kVa	AWG. 10.50/geïnstalleerde kVa
DR		Privé verlichting (DR-Tarief)	Privé verlichting (DR-Tarief)
	Variabel tarief	AWG. 0.5680/kWh	AWG. 0.5444/kWh
PP		Prepaid tarief (PP-Tarief)	Prepaid tarief (PP-Tarief)
A1	0 - 500	AWG. 0.3580/kWh	AWG. 0.3431/kWh
A2	501 - 1000	AWG. 0.3684/kWh	AWG. 0.3531/kWh
A3	> 1000	AWG. 0.4847/kWh	AWG. 0.4645/kWh
	Vastrecht	AWG. 12.50	AWG. 12.50

ta cumpra, por lo mayoria, e energia cu WEB ta genera pa asina ELMAR por transmiti y distribui e coriente den tur bario di Aruba.

Ta pidi comunidad pa

tuma nota di e siguiente tabel: “Prijs Nobo di Coriente 2024”. E prijs nobo di coriente ta vigente pa e consumo di coriente durante e luna di november 2024 riba e factura cu

nos clientenan post-paid lo ricibi na comienso di december 2024, y cu ta vence riba 14 di januari 2025. Pa ELMAR su clientenan pre-pago y EV ChargeUp, esaki lo bay

na vigor entrante awe, diamars 5 di november 2024, for di 5or di atardi.

ELMAR lo sigui informa su clientenan di cualkier desaroyo.

Gobierno di Aruba:

INVESTIGACION NA DIP

Algun siman pasa DIP a constata posibel irregularidadnan durante controlnan interno. A base di esaki hunto cu Departamento di Recurso Humano (DRH) a hasi un investigacion, “feitenonderzoek”. Basa riba e conclusionnan di e investigacion ey,

DRH a entrega keho na Landsrecherche.

E caso awor ta den man di Ministerio Publico, y mas informacion por wordo duna solamente door di vocero di Ministerio Publico.

E caso aki no ta involvi

Minister di Infraestructura mirando cu e proceso di otorga tereno a wordo depolitisa (Minister no ta firma pa duna tereno) y e Minister no ta parti di e proceso, ni di e investigacion.

E dirigencia di DIP ta sigui den man di sr. Ir. Robert

Maduro, manera tabata e caso den ultimo lunanan.

Gobierno di Aruba ta lamenta e caso aki. Mester bisa si cu e sistema di control interno ta funciona y asina por evita casonan di irregularidad den futuro.



Directie Voogdijraad ta a infoma cu nan oficina lo ta cera pa publico Diabierna 8 di november 2024 en conexion cu un actividad pa su empleado.

Prome Minister Evelyn Wever-Croes:

PROME MINISTER Y MINISTER ROCCO TJON
LO PRESENTA TUR PRUEBA DEN REUNION DI
PARLAMENTO MAYAN 5 DI NOVEMBER



Dialuna mainta tabata tin un conferencia di prensa di Gobierno di Aruba na unda Prome Minister Evelyn Wever-Croes hunto cu Minister di Husticia Rocco Tjon a elabora riba e pruebanan cu tin pa demostra cu e acusacionnan haci pa oposicion riba e tema di metemento den Ministerio Publico (OM) ta falso.

Minister Tjon a splica cu riba e fecha di 24 di October, el a manda un carta pa (OM) pa pidi un reaccion di nan banda riba e acusacionnan cu ta wordo haci pa oposicion, y si OM tambe por aclarea si ta berdad cu OM y DRH por coopera cu otro pa den casonan disciplinario informacion wordo comparti. Riba su carta, Minister Tjon a ricibi un contesta dia 30 di October na unda OM ta indica cu desde 2006 tin un protocol firma na unda OM por comparti informacion cu DRH ora tin casonan andando, y cu a base di e protocol aki informacionnan ta wordo comparti y no por medio di instruccion.


Prome Minister a indica cu e acusacionnan cu ta wordo haci

pa Parlamentarionan Marisol Lopez-Tromp, Aquanette Gunn y Miguel Mansur ta cu tabata tin un caso na unda un director di un departamento tabata un sospechoso, y den e caso aki DRH a haya informacion di OM, cual pa nan ta contra ley y ta metemento indebido den OM.

Prome Minister a splica cu e prome base legal pa haci intercambio di informacion ta por medio di un protocol firma na 2006 entre OM y dos departamento di Gobierno di Aruba na unda a palabra cu lo bin un protocol preparando pa cambio di ley.

E di dos base legal ta wordo haya den e ley di 2011 “landsverordening persoonsregistratie Aruba” cu ta combina cu e ley “landsverordening op het Openbare Ministerie” cu ta un ley di 1993. Pues e base legal ta 2011 y 1993 cu hunto aparte di e protocol ta intercambia informacion.

E cooperacion aki ta importante pa evita kiebrot di integridad y pa combati corrupcion. P’esey ta importante pa tin palabracionan



haci cu instancianan cu tin informacion importante pa asina Gobierno por garantisa cu no tin corrupcion mas den e aparato gubernamental. Tambe mester tene semper cuenta cu e privacidad di un persona, mirando cu esaki ta un derecho ancla.

Prome Minister a indica cu e pruebanan aki e acusacion di metemento den OM ta wordo bari di mesa. Den e caso specifico aki, e carta cu e parlamentarionan ta uzando cu nan a publica den prensa, ta un carta na unda OM a manda bisa di ta sera e investigacion riba e persona paso no a haya nada cu el a haci contra ley. Esaki sigur ta muestra cu no por tin metemento, mirando cu e investigacion ta sera.

E di dos acusacion contra Prome Minister, ta cu segun e parlamentarionan aki, Gobierno a saca informacion personal di un empleado publico. Pero e realidad ta cu ta nan a saca e informacion

aki. Nan a haya e documentonan y nan a publicanan. Ningun momento Gobierno a saca informacion cu ta viola privacidad di un empleado.

“Mi kier alerta comunidad cu mayan den e reunion nan ta bay saca tur otro acusacion contra mi persona. Nan ta bay cuminsa cu mi casa, sigui pa mi yiu, mi ruman y mi tata, cual cada un di nan a gana nan caso di difamacion caba.

Nos ta mira cu loke ta pasando na Aruba ta cu nan kier destabilisa nos pais. Lamentabelmente ta forsanan aki na Aruba y Hulanda no kier wak e pais aki stabiel. Nos Gobierno a traha hopi duro pa nos ta para unda nos ta para awe, no ban permiti niun hende destabilisa nos pais. Ban keda tranquil, paso mi colega Rocco Tjon y mi mes lo ta den parlamento y tin tur prueba cu nos. Boso djies keda tranquil y sigui traha positivamente pa hiba pais Aruba padilanti” Prome Minister a expresa.

Cla pa anima estudiante pa sigui den ramo di cuida medico

HOH E WEEKEND AKI PRESENTE DEN ARUBA COLLEGE FAIR

E aña aki Horacio Oduber Hospital (HOH) lo ta presente un bes mas durante Aruba College Fair cu lo ta tumando luga den Renaissance Convention Center riba dia diabierna 8 y 9 di november for di 1:00 pm pa 7:00 pm.

Cathleen Hernandez, Stagecoördinator HOH Academy, a comenta cu HOH lo t'ey na booth number 21 y number 22 p'asina informa e hobennan tocante e oportunidadnan cu tin na hospital y den e mundo medico. Ta e intencion pa HOH informa e hobennan

si acaso nan tin un duda riba nan estudio of si nan tin interes caba den e mundo medico y ta desea di elabora mas riba e topico aki cu un profesional.

Durante Aruba College Fair, lo conta cu presencia di diferente departamento manera Laboratorio, Operatie Kamer (OK) y tambe lo conta cu presencia di diferente trahado di functiekamer cu lo t'ey presente pa duna mas informacion tocante nan disciplina. Lo tin oportunidad pa haci nan pregunta, mira demostracionnan

interesante y hasta lo por train un ke otro.

Importancia pa recluta hoben

Ta hopi importante pa e hobennan wordo inspira pa sigui studia den e ramo medico, pa motibo cu semper tin necesidad pa profesionalnan den e mundo medico. Mundialmente tin un scarsedad di trahado den e ramo di medicina. Sra. Hernandez a expresa cu pa HOH e scarsedad no ta algo diferente, e hobennan ta e futuro pues mester sigui informa nan y inspira nan pa sigui traha den un



di e ramonan di trabou di mas bunita cu ta existi esta brinda cuida medico y miho ainda di calidad na bo comunidad.

HOH ta warda bo

"Si trabou den e mundo medico ta interesa bo, si bo tin duda ainda y kier

sa mas nos ta invita bo pa pasa na nos booth riba dia 8 y 9 di november pa asina bo por haya mas informacion" di e manera aki Cathleen Hernandez ta invita comunidad di Aruba pa bishita Aruba College Fair.

MINISTER GEOFFREY WEVER TA RESALTA E RELACION COMERCIAL IMPORTANTE ENTRE ARUBA Y COLOMBIA

Minister di Asuntonan Economico, Comunicacion y Desaroyo Sostenibel, Geoffrey Wever, a reuni recientemente cu comerciantenan Arubano pa scucha e retonan cu nan ta enfrenta ora ta importa producto for di Colombia. Durante e reunion, Minister Wever a pone enfoke riba un dialogo continuo cu e meta pa facilita comercio mas eficiente y mantene un competencia husto riba nos isla.

"Tin aspectonan cu ta fuera di nos control, pero tambe tin otro puntonan interno cu nos mes mester atende pa mehora. Mi ta kere firmemente den un relacion comercial mas fuerte cu Colombia, cu tin hopi beneficiario pa obtenibilidad di producto pa nos

consumidornan local," Minister Wever a duna di conoce.

Aña pasa Minister Wever a organisa un Trade Mission pa Colombia, di cual hopi comerciante Arubano a mira e beneficiario di dje. Durante e mision comercial pa Colombia, e minister a traha cu determinacion pa planta e simia pa reanudacion di importacion di carni for di Colombia, un paso importante cu lo trece beneficiario significativo pa nos consumidornan. Esaki ta parti di e maneho di e minister pa ehersa diplomacia economico cu partnernan comercial den e region. Entre otro, a ehersa un mision comercial pa Surnam tambe e aña aki cu a resulta den un MoU



pa cooperacion firma entre e dos paisnan.

Minister Wever ta expresa su gratitud na Embahadora di Colombia, S.E. Sra. Carolina Olarte Bacares, pa su bishita na Aruba y pa su compromiso pa scucha e puntonan di mehoracion cu lo por beneficia e laso comercial entre Aruba y Colombia.

"E esfuerso y dialogo continuo di parti di nos ministerio ta un

compromiso pa empuha y sostene comercio, y pa yuda e empresanan Arubano den cualkier forma posibel," Minister Wever a agrega.

"Ta asina cu e minister ta compromete su mes pa sigui traha cu empeño pa fortalece e relacionnan comercial entre Aruba y partnernan comercial di region, y pa yega na un futuro cu mas obtenibilidad di producto y oportunidad comercial."

O'STAD200 INCUBATOR TA CULMINA DEN GRAN FORMA



Oranjestad, Aruba – 4 di November 2024 – Diasabra ultimo, Impact Hub Aruba, Universidad di Aruba y Camara di Comercia a finalisa O'STAD200 Incubator den gran forma. O'STAD200 Incubator ta un program inovativo cu ta brinda un Plataforma di training, workshop y guia pa personanan cu ta aspira di cuminsa of crece un negoshi pa ta miho prepara. E proyecto aki a wordo desaroya pa Impact Hub, cu colaboracion di Universidad di Aruba, Camara di Comercio, y sosteni pa Ministerio di Asuntonan Economico, Comunicacion y Desaroyo Sostenibel.

Despues di un registracion di 42 compania, 20 compania a wordo accepta, di cual 16 compania, consistiendo di 12 'start-ups' y 4 'scale-ups' a logra finalisa e trayectoria di incubacion. Pa 4 luna incubators a pasa door di un periodo intensivo di training, workshop, networking y mentorship, y asina a adkiri tur recurso necesario pa establece of transforma un compania sostenibel y cu ta crea impacto pa comunidad y comercio.

Durante sessionnan intensivo di

Pitch, un panel di 'Sharks' a scucha tur 16 Pitch di compania y a evalua cada compania segun nan capacidad di resolve un problema, potencial den mercado, model di negoshi, nivel di inovacion, factibilidad financiero, potencial di crecimiento, sostenibilidad y impacto di e compania.

E comishon organisatorio di O'STAD200 Incubator ta sumamente orguyoso di e crecimiento di tur participante riba nivel profesional como tambe personal. Segun Sra. Mary-Ann Falconi-Rasmijn, co-founder y General Manager di Impact Hub Aruba, ta splica cu ta hopi remarcabel di con hopi 'entrepreneurship' ta biba den nos comunidad. "Entrepreneurship ta realmente un manera di pensa cu ta permiti un persona identifica oportunidadnan activamente, tin e curashi di tuma iniciativa, y tuma retonan cu un nivel halto di creatividad y abilidad di resolve un problema." Sra. Falconi-Rasmijn ta splica. "E ta un satisfaccion grandi di wak con 'O'STAD200 Incubators' tabata tin tur capacidad di wak mas leu cu solamente solucionnan convencional y ta dispuesto di tuma riesgo pa inova of mehora sea un proceso, producto of servicio", e ta añadi.

Na final di e dia, un panel di 7 'Sharks' a saca e ganadornan den cada categoria di 'Start-up' y 'Scale-up', y tambe a otorga 6 premio adicional di 'Most Innovative', 'Most Sustainable', 'Most Impactful', 'Most Scalable', 'Most Aspiring', y 'Fan Favorite'. Cada ganador maximo a gana AWG 10.000, y pa e premiacionnan adicional tambe tabata tin premio efectivo.

E ganadornan a resulta di ta:
Most Innovative: Denzo Design, founder Densay Hernandez
Most Aspiring: Laycro N.V., founder

Lionel Croes

Most Scalable: Wise in Motion, founder Kevin and Aaron Bislip

Most Sustainable: Lovemade Organics, founder Gianira Maduro

Most Impactful: Quero, Aroma, Arte Botanicals & More, founder Lucette Strijdhafitig

Ganador absoluto Start-Up: EdenEmbrace, founder Elise Maduro-Ras

Ganador absoluto Scale-Up & Fan Favorite: Logopedie Oduber, founder Celina Oduber

Ta di remarca cu e premionan aki no solamente ta resalta e capacidadnan di nos emprendurnan local, pero ta establece un standard nobo pa inovacion y impaction pa Aruba su economia local.

O'STAD200 Incubator ta sumamente satisfecho di e trayectoria y e resultado logra pa cada incubator. Tur participante a demostra dedicacion, resistencia y e capacidad di logra nan meta. Mester enfatisa cu esaki ta solamente un comienso cu un fundeshi solido, pero e trabou real ta bay rekiri dedicacion continuo, consistencia y disciplina pa logra metanan di crecimiento di un compania.

Un palabra di gradicimento ta bay pa tur sponsors, Setar N.V., WEB Aruba N.V., Elite Aruba, Toyota Aruba, Aruba Experience, VNO, Aruba Tourism Authority, AHATA, Bold Bizz, Blue Aruba, Qredits, and Guardian Group, cu a yuda haci O'STAD200 Incubator un realidad. Un palabra di elogio ta bay na tur 40 voluntario cu a aporta cu nan experticio como facilitador, tur 16 mentors cu a haci un trabou excepcional den guia tur incubators. Tambe ta gradici staff y personal di Impact Hub Aruba, Universidad di Aruba Center for Lifelong Learning, y Camara di Comercio pa tur colaboracion y dedicacion den e ultimo 10 lunanan.



E exito di O'STAD200 Incubator ta reafirma e compromiso di Impact Hub Aruba, Universidad di Aruba y Camara di Comercio, pa fortifica e ecosistema di 'Entrepreneurship' na Aruba. Co sosten continuo di parti di comunidad, Gobierno y Comercio, O'STAD200 Incubator por continua crea impacto, inspirando y duna oportunidad na future generacionnan di entrepreneurs Arubiano pa logra establece un posicion den economia local y global.

AKK TA DEDICA NA BUSKA FONDO, DESAROYA PROGRAMA CULTURAL Y ORGANISA EVENTONAN CU TA PONE TALENTO DI HOBENNAN DEN SPLENDOR



Dia 31 di oktober 2024, Vicky Arens, directora di Cas di Cultura a para banda di Mezzo Soprano y fundador di Nos Teater Korsou sra. Tania Kross (Corsow) y directora di Terramar Museum y presidente di Aliansa Kultural Boneiro, sra. Jude Finies (Boneiro), pa hunto lansa e fundacion di Aliansa Kultural Korsou (AKK). Esaki sigur tawata un momento di historia pa e sectornan di cultura di Aruba, Boneiro y Corsow. AKK ta un Aliansa cu ta uni artista y instancianan cultural cu e meta pa fortalece y profesionalisa e sector di Arte, Cultura y Media.

AKK ta dedica na buska fondo, desaroya programa cultural y organisa eventonan cu ta pone talento di hobennan den splendor. Hunto cu Cas di Cultura Aruba, represtando su stakeholders tambe, y

Aliansa Kultural Boneiru, ta uni forza pa promove intercambio cultural y cooperacion den nos islanan y na Hulanda. Den e compilacion di Aliansa Kultural islanan ABC ta bai – sobrepasa obstaculonan constitucional y burocratico – y lo enfoca riba fortalece e herencia cultural cu ta di importancia pa Reino Hulandes.

E iniciativa nobo aki, Aliansa Kultural ABC ta lanta pa artistanan, personanan creativo y organisacionnan cultural di e sector mes cu hunto por stimula un economia cultural tambe.

“Aliansa Kultural Boneiru a keda lanta na 2023 pa 10 organisacionnan local y a aplica y ricibi un “start kapitaal” di 25 mil Euro, ortoga pa ministerio di BZK como meta pa profesionalisa y hiba combersacionnan den comunidad tokante



concientisacion di e trayectoria di Pasado di Sclabitud. Durante 2024 e organisacionnan a reuni structuralmente pa formacion di e organisacion y a ripara cu pa logra metanan fundamental y structural mester traha hunto cu islanan ruman tambe, paso nos ta comparti nos herencia y experticionan den Reino, y trahando hunto nos ta mas fuerte pa comparti e reto di cada isla cu alaves ta garantiza exito colectivo.

Cu e prome combersacion cu Tania Kross, presidente di Nos Teater Korsou, a bira claro cu nos tin cu uni. Tania a envolvi Vicky Arens directora di Cas di Cultura di Aruba cu na otro banda for di 2022 a acerca Tania pa traha hunto. Nos no ta kere den casualidad pero nos ta kere cu awor mas cu nunca intercambio cultural y de conocimiento ta di importancia pa Reino completo, y a keda pa hopi tempo i n n e c e s a r i a m e n t e desatendí”. - Jude Finies



Aliansa Kultural Boneiru.

importante pa un estado di derecho democratico.

Invercion publico den infraestructura cultural, por ehempel pa un Cas di Cultura na Aruba por perdura, actualmente ta e unico teatro riba nos islanan, y pa herencia cultural, pa investigacion independiente y invercion den periodismo investigativo y confiabel, ta asina importante como formacion di ciudadania y fortalecimiento di nos sector social. Esakinan ta fundamento indisputabel pa ciudadanonan keda bon informa, y bira assertivo, y ta un di e fundeshi mas

Fundacion Across The Isles Boneiro lo representa e Aliansa ABC, pa como islanan uni, sinta na mesa cu Den Haag y dialoga tocante BIS (Basis Infrastructuur), Rijksfondsen, Meerjaren regelingen etc. pa haya e trato igual den reino y fondonan cu nos islanan merece. Pa por keda desaroyo pa medio di arte y cultura, pa madura como paisnan pa nos cuidadanonan para mas fuerte den nan sapato.

Prome Minister Evelyn Wever-Croes: HULPBESTUURSKANTOOR A CELEBRA 65 AÑA SIRBIENDO ARUBA

1 december 1959 a inaugura Aruba su prome HBK na San Nicolaas



Recientemente na MFA Savaneta, Prome Minister Evelyn Wever-Croes a atende e celebracion di 65 aña di Hulpbestuurskantoor, HBK. Prome Minister durante su discurso a conta un tiki di e historia di HBK y e motibo tras di esaki.

E motibo principal pa

un Hulpbestuurskantoor tawata pa trece servicio mas cerca di e ciudadano pa asina e ciudadano por gana tempo teniendo e servicicionan di gobierno cerca di cas. E prome diseño di e edificio d HBK tawata di aña 1956 y e destaho publico tabata dia 17 december 1957. E construccion a dura 2 aña y na dia 1 december

1959 a inaugura Aruba su prome HBK na San Nicolaas oficialmente. E HBK di San Nicolas no solamente a trece un alivio pa e habitantenan di San Nicolas pero tambe a tawata un alivio pa e oficina principal na Playa ya cu e fluho grandi di hende a desminui.

Na september 1959, Biblioteca Publico a bay den e mesun edificio di HBK San Nisolas, sigui pa eilandson tvanger apenas 1 luna despues. Na december 1982 a toca pa Savaneta haya su HBK, na aña 1983 na Santa Cruz y na aña 1997 a habri HBK na Paradera. Cu e HBK-nan, gobierno a logra expande, promove, mehora y haci mas accesible tur servicicionan di gobierno den tur distrito.

Na e momento aki HBK ta bayendo den un era digital y lo ta digitalisando procesonan di gobierno pero semper considerando esnan cu no tin acceso na



un computer of no tin tur conocimiento di maneho di esaki. Pa nan lo tin empleadonan na HBK-nan pa duna asistencia cu e servicio cu nan mester. “For di profundo di mi curazon, mi ta gradici cada empleado di HBK pa e servicio y aporte continuo na nos habitantenan. Boso ta e cara di gobierno den e forma mas palpable y

tangible. Sigui haci boso trabao cu mes amor cu boso a bin ta haci durante añanan. No ta tur dia boso trabao ta facil, sinembargo e smile no ta kita for di boso cara pasobra boso tin un tarea pa cumpli cun’e. Sigui duna servicio di calidad, y ban sigui hasi historia hunto”, Prome Minister a expresa.

Endy Croes:

HIBANDO UN CAMPAÑA FUERTE, BISHITANDO CAS PA CAS Y A RICIBI UN BON RECEPCION

Compartiendo e vision di partido MEP



SANTA CRUZ: Den fin di siman ultimo, Endy Croes y Team Endy SI tabata activo un biaha mas, unda a bishita cas pa cas den diferente barrio rond di Aruba.

A comparti e vision y e logronan di partido MEP den gobernacion. "Por a observa cu pueblo ta contento y e portanan ta habri un tras di otro," Endy Croes a subraya.

Tambe na Paradera a tene un reunion di contacto titula: Ban Combersa cu Endy y mester agrega cu un grupo grandi di persona a acudi. Durante e encuentro, a lansa hopi pregunta, pero Endy Croes a sa di contesta tur pregunta corectamente. Diadomingo atardi, a sigui cu e salida masal di partido Mep den e barrio

di Santa Cruz, unda cu tur candidato a sali pa bishita diferente barrio di Santa Cruz. "E recepcion tabata uno exitoso", Endy a indica.

"Mi ta conta cu boso sosten dia 6 di december proximo! "Nos compromiso ta sigui", Endy a finalisa. Un amigo pa semper! Endy SI!



5 EHEMPALAR DI 'E FLOR TRISTO' PA BIBLIOTECA HUBENIL




Muchanan cu tin gana di lesa e storia tocante un flor tristo por fia esaki pronto na biblioteca hubenil. Es-

critora Ariana Koolman-Chirino a regala biblioteca 5 ehemplar pa su dept. Hubenil na Playa y San Nicolas y tambe uno pa e Coleccion nacional. Presentacion a tuma lugar dia-bierna ultimo.

Escritora y poeta Ariana semper a gusta y practica Arte, musica, skirbi, pinta, obra di man, teatro y mucho mas. El a desaroya su mes den literatura, poesia, prosa, Haiku y awo el a tuma e decision pa skirbi buki pa mucha.

Ariana ta autor di e tomo di e poesia 'Mi bahul di poema', co-Autor di e buki 'Maraca' y awo su proyecto mas recien pa nos muchanan cu ta titula 'E flor tristo'. Cu placer y gran honor e autor ta debutando e aña aki den Festival di buki pa mucha.



FORTALEZA PA FAMIA Scirbi pa Pastor Marcel Balootje. AMOR Y RESPET DEN FAMIA TA AGRADABEL DEN BISTA DI DIOS

E ta keda masha mahos ora tin falta di respet den un hogar, ora yui no ta respeta mayor ni tampoco mayor ta respeta yiu. No ta boluntad di Dios, pasobra Dios ta stima union den cada cas di Famia. (Salmo 133).

No ta algo di broma cune, ora un yiu ta halsa bos pa su mayornan, y bo ta tende e mucha ta malcria, pasobra malcriansa ta bini door di descuido di mayor, ora mayor ta negligha nan autoridad, ora mayor no tin tempo pa educa su yiu, tampoco pone displina, esey ta e causa di malcriansa.

Y malcriansa ta cuminsa den cas, y si e no wordo controla e ta bira rebeldia, y rebeldia no tin limite, pasobra rebeldia lo demostra su mes tur caminda, riba caya, na scol, y hasta den cas di Dios, pasobra rebeldia ta spiritual, pasobra e tin un mal spirito ta obra rond di dje.

Ta boluntad di Dios, pa den tur cas por tin amor y respet, pasobra eynan tambe lo tin pas, y oracion y alabansa por tuma lugar sin ningun estorbo.

Mayor ta e prome mentor di nan yuinan, teniendo na cuenta, cu responsabilidad di mayor ta un yamado di Dios, y cu enfasis mester wordo poni, pasobra Dios ta bisa mayornan pa lanta nan yuinan den e disciplina di Señor. (Efesionan 6:4).

Mayor mester ta masha consciente locual e palabra di Dios ta bisa; Mihor un tayo di berdura caminda tin amor, cu un toro gorda, y odio hunto cune. (Proverbionan 15:17).

E asunto di ta laga material dirigi famia, caminda hende su bista ta dirigi mas riba placa, auto y tur locual ta herencia, hopi biaha ta trece division y e amor berdadero cu mester resplandece den cas di famia no tey.

Esun cu ta confia den su

rikesa lo cay, ma e husto lo florece manera blachi berde. (Proverbionan 11:28).

Esun cu tormenta su mes cas, lo hereda biento, y e bobo lo ta sirbido di esun cu ta sabi di curason. (Proverbionan 11:29).

Un hende cu ta trece desorden den su propio cas, pa medio di buracheria, parandiamiento, uso di droga y alcohol, adulterio, inmoralidad etc, no ta stima su famia, tampoco ta stima Dios. Pasobra e palabra di Dios ta bisa lo siguiente: Si un hende bisa: Mi ta stima Dios, y ta odia su ruman, e ta un gañado, pasobra esun cu no ta stima su ruman cu e a mira, no por stima Dios, kende e no a mira. Esun cu ta stima Dios, mester stima su ruman. (1 Juan 20-21).

Laga nos papia cu tur claridad posibel, un hende cu ta trata su famia, malo especialmente cu abuso verbal, violencia domestico, adulterio, inmoralidad etc, su relacion cu Dios ta kibra.

E palabra di Dios ta bisa: Mas si un hende no provee pa su mes hendenan, y specialmente pa esnan di su cas, e a nenga fe y ta pio cu un incredulo. (1 Timoteo 5:8). Como mayor nos tur tin e deber sagrado, di cria nos yuinan.

Tur hoben mester tene cuenta cu locual a palabra di Dios ta bisa: Honra bo tata y bo mama, pa tur cos bay bon cu bo y lo bo tin bida largo riba tera. (Efesionan 6:1-2)

Mi yiu warda e mandamento di bo tata. Y no bandona siñansa di bo mama, y mara nan continuamente riba bo curason, mara nan rond di bo garganta, Ora bo ta riba caminda nan lo guia bo. Pasobra e mandamento ta un lampi, y e siñansa ta lus, y e reprendemento di disciplina ta e caminda di bida. (Proverbionan 6:20-23).

PARLAMENTARIO SETTY CHRISTIAANS-YARZAGARAY A IMPULSA CAMBIONAN PA SALUD, BIENESTAR DI ANIMAL Y DESAROYO SOSTENIBEL



ORANJESTAD, Aruba, 4 di november 2024: Parlamentario Louissette 'Setty' Christiaans-Yarzagaray di Fraccion di MEP, a pone enfoke riba un serie di desaroyonan importante durante su periodonan den Parlamento di Aruba, enfoca na bienestar di comunidad, sostenibilidad, y progreso social.

Un di e proyectonan mas sobresaliente di Yarzagaray ta su esfuerso pa implementa castigo mas severo contra abuso di mascota. E

ta trahando riba cambio di ley pa crea consciencia, hisa castigo y aumenta proteccion pa cacho, pushi y otro animal domestic y responsabilidad na e doñonan, demostrando su compromiso pa promove respet pa sernan vulnerabel.

Otro logro significativo ta e mocion, cu a wordo aproba unanimamente, pa crea un sistema pa centralisa e resultado di test medico di pashent y citanan medico. Esaki ta pone cu e pashent por tin acceso rapido na su propio informacion medico y sigui su file medico, planea un afspraak (volgsysteem), fortaleciendo un sistema di salud mas transparente y accesibel.

Por menciona tambe, su

iniciativa pa introduci e 'Bijzonder Commissie' di Metanan di Desaroyo Sostenibel (SDG) pa yuda pone e metanan di SDG den 'forefront' di e politiconan di Aruba, den busca di un futuro mas sostenibel pa un y tur.

Parlamentario Christiaans-Yarzagaray tambe a reconoce e importancia di maneha reproduccion responsabel di cacho y pushi, presentando un mocion, cu a wordo aproba, pa crea deducccion di belasting pa doñonan cu sterilisa nan mascota. Esaki no solamente ta dirigi contra sobrepoblacion di animal domestic, sino tambe promove salud publico y bienestar di animal.

Un otro area di impacto

ta su mocion pa recalibra e 'bestaansminimum' di Aruba. Cu un recalculation y un analisis di e splicacion relaciona cu pobresa, e medida aki ta duna gobierno y organonan cu ta traha pa yuda comunidad un base mas concreto pa forma plannan y maneho di apoyo economico y social.

Ademas, Christiaans-Yarzagaray a propone y realisa e aceptacion di un 'Geographical Information System' (GIS) cu ta un plataforma digital cu por combina informacion di diferente departamento di gobierno riba un mapa digital di Aruba.

E herment aki ta permiti gobierno pa planifica infraestructura y servicionan cu

mas eficiencia y precision.

Finalmente, Christiaans-Yarzagaray a asegura fondonan pa finalisa e 'Tourism Satellite Account' (TSA), un sistema cu ta contribui pa un calculacion mas preciso di turismo su impacto den economia di Aruba, un proyecto realisa awor pa pais Aruba.

Esaki ta resalta su dedicacion pa desaroyo economico a base di informacion concreto, pa asina guia decisionnan strategico cu ta beneficia tur hende. Parlamentario Christiaans-Yarzagaray su esfuerso no solamente ta fortifica e sistema legislativo di Aruba, sino ta crea un futuro mas sostenibel y bunita pa comunidad henter.

MASTER ANTWUAN WILSON DI MERCA TA PREPARANDO SU TEAM PA BEST OF THE BEST



Despues di e evento di Worldwide Martial Arts Sports na Orlando, Florida unda cu Aruba a logra gana 4 Medaya di Oro, Master Antwuan Wilson di Champions Martial Arts ta preparando su team duro pa e evento di mas grandi di Aruba cu ta Best of the Best 2024.

Master Antwuan Wilson ta determina pa hunto cu su team nan haci un bon papel na Aruba den Best of the Best 2024.

Bisando esey Aruba mester ta bon prepara pa tur e Paisnan Internacional cu ta bay bin pa Best of the Best 2024.



TA BUSCA

PERSONAL PA TRAHA
NA "MARTYOU UNISEX CARING
SALON"

**PERSONA PROFECIONAL:
UN ESTILISTA- UN BARBERO Y
UN MANICURISTA**

TEL: 561-8504 OF 746-3489

Atleta Nacional Kieyon Henriquez cu medaya di brons den WAKO 2024 na Chile




manera Uruguay y Chile. Den e semi final contra e atleta di Venezuela, Kieyon no a logra pasa p’e final pero si a logra si trece e medaya di Brons pa Aruba. Como cu e ta un evento den cual bo mester cera un team pa participa, Kieyon a forma parti di e team di su welo di

Boneiro WAKO team 2024. Na nomber di su famia Henriquez, Maduro y tur su amigo- y coleganan, felicitacion cu hopi orguyo ta ser manda pa nos atleta campeon di Aruba. Kieyon ta ex alumno di Filomena College Mavo y Colegio Nigel Matthew.





























E siman cu a pasa e atleta nacional di kickboxing, Kieyon Henriquez di 20 aña, a biaha pa Santiago, Chile unda cu el a participa den e competencia grandi aki cu mas di 520 atleta for di 18 pais rond mundo, den 120 categoria y 7 disciplina. E evento aki t’e World Association Kickboxing Organisation “WAKO” Santiago de Chile 2024 cu ta e campeonato Pan Americano 2024 cu ta uno oficial cu ta habri e porta pa weganan olimpico. Den su categoria el a bringa contra atletanan di paisnan



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com

Resultado: Sorteo di Anochi - November 05, 2024

 <p>Sorteo # 8390</p> <p>3451</p> <p>4253</p> <p>7746</p> <p>X3</p> <p>BIG 4</p> <p>Sorteo # 7434</p> <p>3719</p> <p>X2</p> <p>10FF</p> <p>Sorteo # 2139</p> <p>9105</p> <p>ZODIAS</p> <p>Sorteo # 6193</p> <p>6807</p> <p>Libra</p> <p>LUCKY 3</p> <p>Sorteo # 1123</p> <p>360</p> <p>X2</p>	<table><tr><td><p>Sorteo #</p><p>0 x Jackpot</p><p>0 x Match 4+</p><p>0 x Match 4</p><p>0 x Afl. 12,00</p></td><td><p>Joker</p><p>Letter</p><p>Proximo Jackpot</p><p>130.000,-</p></td></tr><tr><td><p>Sorteo # 6645</p><p>0 x Jackpot</p><p>6 x Match 4</p><p>158 x Afl. 8,00</p></td><td><p>04-07-17-25-27</p><p>Proximo Jackpot</p><p>60.000,-</p></td></tr></table>	 <p>Sorteo #</p> <p>0 x Jackpot</p> <p>0 x Match 4+</p> <p>0 x Match 4</p> <p>0 x Afl. 12,00</p>	<p>Joker</p> <p>Letter</p> <p>Proximo Jackpot</p> <p>130.000,-</p>	 <p>Sorteo # 6645</p> <p>0 x Jackpot</p> <p>6 x Match 4</p> <p>158 x Afl. 8,00</p>	<p>04-07-17-25-27</p> <p>Proximo Jackpot</p> <p>60.000,-</p>	<table><tr><td><p>Sorteo #</p><p>0 x Jackpot</p><p>0 x match 4</p><p>0 x Afl. 500,00</p><p>0 x Afl. 50,00</p><p>0 x Afl. 15,00</p></td><td><p>Mega Ball</p><p>Proximo Jackpot</p><p>280.000,-</p></td></tr><tr><td><p>Sorteo #</p></td><td><p>Afl. 380.000,-</p></td></tr></table>	 <p>Sorteo #</p> <p>0 x Jackpot</p> <p>0 x match 4</p> <p>0 x Afl. 500,00</p> <p>0 x Afl. 50,00</p> <p>0 x Afl. 15,00</p>	<p>Mega Ball</p> <p>Proximo Jackpot</p> <p>280.000,-</p>	 <p>Sorteo #</p>	<p>Afl. 380.000,-</p>	<table><tr><td><p>Sorteo #</p></td><td></td></tr></table>	 <p>Sorteo #</p>	
 <p>Sorteo #</p> <p>0 x Jackpot</p> <p>0 x Match 4+</p> <p>0 x Match 4</p> <p>0 x Afl. 12,00</p>	<p>Joker</p> <p>Letter</p> <p>Proximo Jackpot</p> <p>130.000,-</p>												
 <p>Sorteo # 6645</p> <p>0 x Jackpot</p> <p>6 x Match 4</p> <p>158 x Afl. 8,00</p>	<p>04-07-17-25-27</p> <p>Proximo Jackpot</p> <p>60.000,-</p>												
 <p>Sorteo #</p> <p>0 x Jackpot</p> <p>0 x match 4</p> <p>0 x Afl. 500,00</p> <p>0 x Afl. 50,00</p> <p>0 x Afl. 15,00</p>	<p>Mega Ball</p> <p>Proximo Jackpot</p> <p>280.000,-</p>												
 <p>Sorteo #</p>	<p>Afl. 380.000,-</p>												
 <p>Sorteo #</p>													

Mas tata a participa na Best Dad Ever



durante 7 sesion tatanan y futuro tatanan ta traha ariba nan habilidadnan pa ta un mihor tata di locual cu nan ta caba. Best Dad Ever ta stimula e participacion di hende homber den educacion di nan yiunan. E tatanan ta ricibi tips, informacion y conocimiento con nan por ta mas involucra den bida di nan yiu.

Estudio haci na Aruba na 2012 a muestra cu e relacion entre tata y yiu na Aruba lo ta zwak.



Esaki a pone cu 131 a laga haci un estudio mas profundo na aña 2016 pa asina aki haya un mihor bista di kiko tatanan ta pensa di nan rol den educacion di nan yiunan. Un di e resultadonan di e estudio ta cu tatanan kier ta mas involucra cu educacion di nan yiunan. Debi na esaki 131 a crea Best Dad Ever na 2016 y a cuminsa cu implementacion di Best Dad Ever na 2017.

Algun temanan cu ta parti di e sesionan ta por ehempel: impacto di un tata, planea famia, duna cuida, violencia etcetera etcetera. Algun partner cu tambe tawatatin un rol durante algun di e sesionan ta Famia Planea, partera Michael Quandt, Centro di Bario Lago Heights, Scol Caiquetio y Croon Caribe.

Best Dad Ever por tuma lugar danki na sosten di Setar N.V, Aruba Airport Authority N.V. y The Salamander Group.

Pa mas informacion tocante Best Dad Ever por tuma contacto via nos website: 131.aw, Instagram: Instagram: 131aruba, facebook: <https://www.facebook.com/aruba.131>, email: 131aruba@gmail.com of telefon 5886138/ 5884011.



‘E cos aki tawata manera un terapia pami. Mi a siña hopi di mi mes’. ‘Ya mi a cuminsa implementa varios cos cu mi yiu mas grandi’: Un tata cu a participa na e sesionan di Best Dad Ever ta duna su opinion na final di e proyecto.

For di 15 di october te cu 31 di october ultimo na Centro

di Bario Lago Heights, un grupo di tata a participa na e proyecto Best Dad Ever y a finalisa Best Dad Ever cu un certificado. E tatanan a ser recluta door di Scol Caiquetio y Croon Caribe.

Desde aña 2017, 131 ta organisa Best Dad Ever cinco biaha pa aña. Best Dad Ever ta un proyecto caminda cu,



PAY AS YOU CAN

Piedraplat ☎ 582 0000
Sanicolaas ☎ 584 8888 | 5820000
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411
www.olivetreefuneralhome.com

ORACION DI DIA



Un feliz dia bendiciona colma cu hopi amor, fe y speransa den nos Bon Dios

Despues di un rato e cria a bisa su shon: ‘Señor a cumpli cu bo ordo, ma toch a sobra luga!’ (Lucas 14: 22)

Nos ta forma un solo curpa pa medio di nos union cu Cristo y nos ta uni mescos cu partinan di un solo curpa (Rom. 12: 5). E cria lo a haya duele ora prome invitadonan a nenga. Asina mes el a sigui cumpli cu ordo di su shon y aunke el a cumpli toch a sobra luga. Esaki ta muestra cu e ta persevera y cumpli cu zelo cu su shon y ta na paz. Nos tin cu traha pa, y sirbi Señor cu zelo (Rom. 12: 11). Pero, Señor tin mas luga, pues e capacidad pa invitadonan pa e reino di Dios ta surpasa e expectativa di cada un di nos. Hesus ta siña nos pa cumpli cu ordo di Tata. Aunke nos por pasa den tribulacion y perseverancia, oracion constantemente ta yuda paso e speransa cu nos tin lo haci nos contento (Rom.12: 12). Paso cerca Señor nos ta na paz manera un yiu cerca su mama (Salmo 131).
Oracion: Señor regala nos gracia pa nos compartidonnan conforme Bo boluntad y biba den harmonia cu otro.
Amen.

Addonsito Croes ta felicita y gradici Cas Princesa Aruba



E siman cu a pasa mi tawatin e oportunidad di fungi, pa di 10 aña sigui, como e maestro di ceremonia principal di e bunita certamenan di Cas Princesa Aruba esta Princess Beauty, Little Beauty y Pre Teen Beauty 2024. Desde aña 2014 cu directora Jessica Anthonij a acercami, mi a keda pre-

senta e evento cu hopi cariño. E ta un show cu tin nada di “gap” den dje y ora cu nos start 7:00, e show ta cana, bon organisa, te final. Pabien Cas Princesa Aruba, pabien Diamond Models y Dancegroup, danki cada hurado y pabien tur ganador. Danki pa sostene e or-

ganisacion cu tin e meta di semper saca cara di nos isla internacionalmente. Un danki grandi tambe na Xamarah Anthonij, Vi Reina Mini World 2024, p’e regalo unico cu bo a brindami riba escenario. Na Prensa di Aruba danki pa e colaboracion y sosten di semper.



	7			6				9
6			5				8	
		4				7		
	3				6			
2				5				8
			4				1	
		3				4		
	2				7			3
1				8			2	

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4

140 SUPERVISOR TA ELEVA NAN HABILIDADNAN DEN BOOTCAMP OFRECI PA AHATA DEN COLABORACION CU CHTAEF



ORANJESTAD, Aruba: 11 November 2024 – Despues di e gran exito y demanda di aña pasa, mas supervisor rond di Aruba ta hayando e oportunidad pa eleva nan habilidadnan di supervision cu un bootcamp di CHTA Education Foundation cu ta ser ofreci pa Aruba Hotel & Tourism Association (AHATA).

E bootcamp di dos dia ta diseña especificamente pa lidernan di ekipo y 140 participante a registra pa tuma e curso den luna di November. E demanda pa e entre-

namento tabata evidente ya cu tur cupo a yena den poco tempo.

E tayer ta brinda sosten na supervisornan y nan gerentenan, y ta siña nan con pa fortalece y mehora nan habilidadnan pa supervisa nan ekipo, pa asina aumen- ta satisfaccion di nan ekipo y di cliente. E entrenamiento ta wordo presenta pa Louise John y Suzanne Shillingford-Brooks di Talkabout & Earth Solutions, e facilitadonan pa CHTA Education Foundation.

“Ta un satisfecho grandi pa mire e interes pa e curso especial aki cual ta yuda fortalece e calidad di supervision na trabao y consecuentemente ta mehora servicio na Aruba. AHATA tin como meta pa sigura exito sostenibel di nos economia y yuda nos miembronan desaroya nan personal.”, a comparti Presidente y CEO di AHATA, Tisa LaSorte.

AHATA ta aprecia cu La Cabana Beach Resort y Eagle Aruba Resort ta patrocina e bootcamp, y ta aprecia e aliansa valioso cu CHTAEF.

CAS PRINCESA ARUBA Y PRINCESS-, LITTLE- Y PRE TEEN BEAUTY 2024

Fin di siman fundacion Cas Princesa Aruba a tene e final di su 3 certamennan Princess-, Little- y Pre Teen Beauty 2024. Den un Cas di Cultura sold-out, 11 candidata dje 3 categorianan a competi den un show cu a cana tremendo sin gap. E MC tawata Addonsito Croes y Diamond Dancers a presenta durante e anochi cu e tema: Indjannan di Aruba. E tres reinanan saliente Arriah Stamper, Elise Heronimo y Samantha Romero a tene un bunita despedida. Tambe Miss Ambar Mundial 2023 Jayleen Croes a corona Aruba su Miss Ambar nobo Sendi Loefstop cu

otro aña lo competi p’e titulo mundial na Republica Dominicana. Tambe Aruba su Vi-Reina Mini Model World 2024, Xamarah Anthonij a duna un bunita show di despedida.

Na final e cuerpo di hurado Carol Croes, Jaseline Navas, Raquelita Maduro, Suhaila Alders, Alexia Ching y Zuleica Gomes a duna como resultado:

PRINCESS BEAUTY 2024: Haily Comenencia.

Prome finalista: Alina Wever

LITTLE BEAUTY 2024: Carly-Yenne Maduro

Prome finalista: Leyni Boekhoudt

PRE TEEN BEAUTY 2024: Mia Mc Collum

Prome finalista: Mariangel Ferrer

E premionan adicional tawata:

Best dress Princess: Haily Comenencia,

Best dress Little: Leyni Boekhoudt,

Best dress Pre Teen: Mia Mc Collum,

Princess y Little Amistad: Leyni Boekhoudt,

Pre Teen Amistad: Mia Mc Collum,

Princes Talento: Haily Comenencia,

Little Talento: Carly-Yenne Maduro,

Pre Teen talento: Jovienne Geerman,

Social Media: Alina Wever,

Miss Popular: Hailey Comenencia,

Princess Fotogenica: Alina Wever,

Little Fotogenica: Carly-Yenne Maduro,

Pre Teen Fotogenica: Mia Mc Collum.

Pabien organisacion Cas Princesa Aruba su team,

bou guia di Jessica Anthonij, Jayleen Croes, Jasiann Croes, Lena & Ramiro Anthonij, Enid Croeze,



Elmer Leañez, Addonsito Croes y team di Diamond Dance & Modeling group.

Mas informacion por acudi na e Instagram y Facebook page di Cas Princesa Aruba.



Resultado di Campionato Nacional di Hisamento di Peso



Diadomngo cu a pasa dia 27 oktober 2024 Aruba Amateur Weightlifting Association a tene nan Campionato Nacional di Hisamento di Peso cu a tuma lugar den Compleho Deportivo Frans Figaroa na Noord

Presente na nos Campionato Nacional di Hisamento di Peso tabata Sra. Nicole Hoevertsz Vice Presidente di Comité Olimpico Internacional y Secretaria General di Comité Olimpico Arubano cu a duna un speech y a desea tur e atletanan hopi éxito den nan competencia

Den e campeonato aki a wordo hisa den categoría di masculino y femenino Youth, Junior, Senior y Master. E clubnan cu a participa ta E2REP Fitness, Paradise Strength Aruba, TNT Gym y tambe nos por a wak participacion di paisnan Curacao, Canada y Cuba na nos Campionato Nacional.

Nos por bisa cu e atletanan a competi bon mes y nan tabata hopi motiva y varios di e atletanan a sa di kibra nan propio record personal y varios di nan a logra bira champion nacional y a gana nan medaya den nan categoría. Tambe Trofeonan a wordo entrega na e atletanan cu a

sali champion di Aruba den nan categoria di Youth, Junior, Senior y Master.

Den categoría di femenino Youth, ganador cu mihor Sinclair 215.85 ta e atleta Rory van Ulft di apenas 11anja di edad for di Canada, segundo lugar a bai pa atleta cu Sinclair 200.86 pa Caytlynne Lanoy di TNT Gym y Tercer lugar a bai pa atleta cu Sinclair 143.84 pa Chantal Mousalli tambe TNT Gym.

Gandornan den categoría di Senior na prome lugar cu mihor Sinclair 219.07, trofeo a bai pa Nataly Geerman di TNT Gym, trofeo na segundo lugar cu Sinclair 125.35 a bai pa Ettel Boyce di E2Rep

Ganador den categoría Master femenino cu mihor Sinclair 103.97 na di prome lugar pa Christy Rodriguez di PSA y trofeo na segundo lugar cu Sinclair 108.53 a bai pa Wendy Maduro di E2Rep.

Den categoría di masculino Youth como ganador absoluto cu mihor Sinclair 293.85 ta e atleta Derrick Webb TNT Gym cu a gana e bonita trofeo y segundo lugar trofeo a bai pa Sean Maduro di TNT Gym cu un Sinclair 144.42.

Den categoria masculino Senior cu e mihor Sinclair 327.63 trofeo a bai pa Laertes Araque di TNT Gym, trofeo na di segundo lugar a bai pa e atleta Ross Ismail di PSA cu Sinclair 237.75 y trofeo na di tres lugar a bai pa e atleta Osmar Bislip di PSA cu Sinclair 234.22

Den categoría masculino Master cu e mihor Sinclair 279.88 trofeo a bai pa e atleta Rene Rudel di PSA, trofeo na di tres lugar cu Sinclair 268.30 a bira e atleta Lucas dos Anjos di PSA y trofeo na di tres lugar a bai pa e atleta for di Curacao Yhurisen Molenaar cu Sinclair 268.32

Na final di e competencia a duna reconocimiento na tres refereenan cu mas di diez anja ta asisiti den competencianan local. E tres referee nan ta Sr. Remigio Wever, Sergio Faro y Frederick Tromp. Tur e tres refereenan a recibi un bonita plakaat for di man di Sr. Hugo Themen Presidente di AAWA y Soraida Boekhoudt Presidente di ASU.

Trofeo y medaya a wordo entrega door di Director di IBISA Sr. Isnardo Faro, un atleta Olimpico den e de-

porte di Hisamento di Peso..

Aruba Amateur Weightlifting Association ta manda palabra di gradicimento na tur atletanan y clubnan pa nan participacion y pabien tambe na tur e atletanan cu a kibra nan record personal y tur cu tabata involvi den e evento aki ta e voluntarion-

an, entrenador y e publico cu apoya e atletanan te na final pa esaki bira uno exitoso.

Pa no lubida Palabra di gradicimento ta bai na e sponsernan di e Campionato Nacional cu ta Stichting Sportsubsidie Aruba, Lotto pa Deporte y High Performance Aruba.

MARAVILLAS DE LA FE

SALUD SUERTE AMOR

• BO TA SUFRI DI MALESA NAN CU BO NO POR CURA ?

MANERA ARTROSIS, ALZAHEIMER, EMENCIA, DEPRESSION, DIABETES, OSTROPOROSIS, PARKINSON, INSOMNIO, DOLOR DI BARIGA, WESO. ETC

• BO TA BEBE REMEDIY BO NO TA CURA?

• BO TA VICTIMA DI BRUHERIA?

COMUNICA CU MARAVILLAS DE LA FE NA 7485671

• BO NO TIN SUERTE?

• BO SEN NO TA YEGA ?

• BO TA BAI CASINO I PERDE TUR BO PLAKA?

COMUNICA CU NOS NA 7485671

• BO TIN PROBLEMA DI AMOR ?

• BO PAREHA TA GANA BO ?

FRACASO - SOLEDAT - ANGUSTIA



7485671

